

ANG

PAHAYAGAN NG PARTIDO KOMUNISTA NG PILIPINAS
PINAPATNUBAYAN NG
MARXISMO-LENINISMO-MAOISMO

Bayan


Espesyal nga Isyu

Edisyong Hiligaynon

Disyembre 26, 2000

Pahulagon ang malapad nga masa sang pumuluyo agud ihatag ang pangpatay nga bunal sa rehimeng Estrada

Ni Armando Liwanag
Tagapangulo, Komite Sentral
Partido Komunista ng Pilipinas



Sa pagsaulog sang ika-32 anibersaryo sang liwat nga kalig-on nga Partido Komunista ng Pilipinas sa idalum sang teoretikal nga ubay sang Marxismo-Leninismo-Maoismo, bug-os nga kalig-on naton nga pahulagon ang malapad nga masa sang pumuluyo agud ihatag ang pangpatay nga bunal sa rehimeng US-Estrada, pabas-kugon ang tanan nga rebolusyonaryo nga pwera kag

Ginabantala sang Komite Sentral sang Partido Komunista ng Pilipinas

pasingkion ang tanan nga porma sang rebolusyonaryo nga paghimakas.

Bunga sang madinalag-on nga Ikaduhang Dungganon nga Kahublagan sa Pagpanadlong, kita ara sa pusisyon agud ipatuman ang gilayon nga katuyuan nga pukanon ang rehimen kag iabanse ang malawigan nga katuyuan nga pukanon ang bilog nga nagahari nga sistema sang dalagku nga kumprador kag agalon nga mayduta kag tukuron ang demokratiko nga sistema sang banwa sang mga mamumugon kag mangunguma sa pagpamuno sang Partido Komunista ng Pilipinas.

Ginahatag naton subong ang pinakamatag-as nga pagdungog kay Kaupod nga Armando Teng, katapu sang Komite Sentral, Buru nga Pangpulitika, Komiteng Tagpatuman kag sekretaryo sang Komisyon sa Nabagatnan Luzon sang Partido, nga napatay kasan-o sa balatian, kag sa tanan nga aton nga mga rebolusyonaryo nga martir kag bayani. Kag ginapalab-ot naton ang pinakamainit nga pagsaludar sa tanan nga kadre kag katapu sang Partido, Pulang kumander kag hangaway sang Bagong Hukbong Bayan (BHB), mga alyado sa Pambansang Demokratikong Prente ng Pilipinas (PDPP) kag sa malapad nga masa sang pumuluyo para sa tanan nga kadalag-an nga naangkon sa nagligad nga tuig.

Dalagku ang pag-abanse nga naangkon naton sa pagbilog sang Partido sa ideolohiya, pulitika kag organisasyon. Sa kapin 100 larangang gerilya sa bilog nga pungsod, napabakud sang BHB ang iya kaugalingon, nagpatuman sang reporma sa duta kag hilikuton pangmasa kag nag-agom sang masanag nga kadalag-an sa armado nga paghimakas. Pareho sa kasyudaran kag kaumhan, natukod naton ang lain-lain nga tipo sang mga organisasyon nga masa kag nadala ang kahublagan nga masa sa bag-o kag mas matag-as nga lebel sang pag-uswag.

Halin sang magpungko sa poder sadtong 1998, ginpalala sang rehimen nga US-Estrada ang pagpamigos kag pagpanghimulos sa pumuluyo sa pagka sunud-sunuran sa dumuluong nga monopolyo kapitalismo, pagpalala sa pyudal kag malapyudal nga kundisyon kag wala sang untat nga burukratiko nga korupsiyon. Ini hayagan nga naghulag bilang kaaway sang pumuluyo sa pihak sang pagpupustura sini nga makaimol.

Sangkuan ang pagkaarogante, inutod ni Estrada ang negosasyon nga pangkalinongan sa tunga sang GRP kag NDFP kag nagpaandam nga wasakon ang rebolusyonaryo nga kahublagan. Subong nga akusado siya sa mga pinakabaraghal nga krimen sang korupsiyon kag pagpanulis, desperado siya nga nagabato agud makapabilin sa pulitika.

Ang malapad nga masa sang pumuluyo, upod ang mga kasimanwa sa iban nga pungsod, nagakaugot sa iya mga krimen kag nagapanawagan nga pahalinson siya sa poder. May isa ka malapad nga nagahiliugyon nga prente nga bug-os nga naglain sa iya kag iya grupo kag may ikasarang ini nga pahalinson siya sa poder.

Ang rehimen nga US-Estrada ara sa higad sang kamatayon nga pangpulitika samtang ang rebolusyonaryo nga kahublagan nga masa mapagsik nga nagaabanse. Ang Partido nagatungod sang yabi nga papel sa pagpahulag sa malapad nga masa sang pumuluyo kag sa paghatag sang pangpatay nga bunal sa rehimen. Ang pumuluyo ara sa proseso subong sang paglubong sang isa pa nga reaksiyonaryo nga rehimen sa basurahan sang kasaysayan.

I. ANG SALABTON SANG REHIMENG ESTRADA KAG SANG BILOG NGA NAGAHARI NGA SISTEMA

Ang rehimen nga Estrada pareho produkto kag paglala sang nagapadayon nga krisis sang garok nga nagahari nga sistema. Isa ka nagamurarat nga katibayan sang garok kag nagatunaw nga kinaiya sang sistema nga ang isa ka kasubong ni Estrada nangin presidente sang neokolonyal nga republika. Ginatingob niya ang kadalukan ang kadalukan sang mga imperyalista, ang pinakamasupog sa mga lokal nga reaksiyunaryo kag mga sindikato nga kriminal.

Pagkatapos sang krisis sa pinansya kag ekonomiya sang 1997, napili si Estrada gikan sa isa ka tumpok sang mga reaksiyunaryo nga kandidato paagi sa ipokrito nga pagpakita sa kaugalingon bilang kampion sang mga imol kag pagtamay sa mga krimen kag kahuyangan sang rehimen nga US-Ramos. Halin sa umpisa sang iya pagkapungko, ginpakita ni Estrada ang iya pagpakanubo sa pumuluyo, labina sa nagaantos nga masa nga anakbalhas nga mamumugon kag mangunguma.

Ginbandera niya ang pagsakdag kag pagpakig-abyan sang mga Marcos, sang pinakabantog nga mga kroni ni Marcos pareho ni Eduardo Cojuangco kag Lucio Tan kag sang mga kriminal nga *gangster* pareho ni Atong Ang. Ginaprubahan niya ang mga gindikta nga polisa sang IMF, World Bank kag WTO sa isa ka pagbaratilyo sang soberanya nga pang-ekonomiya kag pungsudnon nga patrimonya. Lapas sa pungsudnon nga soberanya kag teritoryal nga integridad sang Pilipinas, iya ginpalusot sa Senado ang ratipikasyon sang Visiting Forces Agreement.

Indi pa man nakatunga ang iya anum ka tuig nga pagserbisyo, siya na-*impeach* sang Kongreso kag subong nakasaka sa bista sa Senado bangud sa baraghal nga pangsuhol, pangwarta kag burukratiko nga korupsiyon,

pagtraydor sa salig sang banwa kag paglapas sa konstitusyon sang 1987. Nagakaugot ang taumbayan kag nagahiwat sang mga pungsudnon nga aksyon nga masa agud pahalinson siya ukon pwersahon siya nga magresayn. Ang kasugot sa malapad nga nagahiliugyon nga prente sang mga organisado nga pwersa pahalinson siya halin sa gahum bangud sa imoralidad, korupsiyon, kawad-an-sang-ikasarang kag pagpamigos.

Husto lamang nga magpokos sa salabton si Estrada kag sang iya nagahari nga grupo kag sa kinahanglanon nga pukanon sila. Pero indi naton pagkalimtan nga ang bilog nga nagahari nga sistema labi pa nga nangin mapanghimulos kag manogpigis bangud sa polisa sa “hilway nga balaligyaan” nga ginadikta sang mga imperyalista nga kumpanya, bangko kag multilateral nga ahensya nga pareho sang IMF, World Bank kag WTO. Ginpadasig kag ginpalala sang mga ini ang pagpuga sang tubo sang mga imperyalista, ang pyudal kag malapyudal nga akumulasyon sang duta kag burukratiko nga pangwarta. Ini madasig nga nagresulta sa malala nga pagpamatuk sang taumbayan kag sa pagkahimulag sang rehimen nga Estrada.

Ang neokolonyal nga nagahari nga sistema mas madasig nga ginbangkarote sang pag-apin sa mga polisa nga “neoliberal” sang sa pag-apin sa mga polisa nga “Keynesian” nga ara sa putok-putok sa panahon sang pasista nga rehimen nga Marcos paagi sa mga pulos sa pangwarta nga *public works* kag wala sang untat nga dumuluong nga pagpangutang. Labi nga ginpalala sang pag-apin sa polisa nga “neoliberal” ang malakolonyal kag malapyudal nga kinaiya sang katilingban bunga sang pagpangawat nga sulod sang kapital sa pinansya, liberalisasyon sang *imports*, pribatisasyon sang ginapanag-iyahan sang estado kag deregularisasyon sa kahalitan sang pungsod, paggawa kag palibot.

Bisan san-o, ang ekonomiya labi nga nangin agraryo kag malapyudal. Labi na subong ini nga nakasalig sa pag-eksport sang hilaw nga materyal kag manubo nga balordugang nga mala-manupaktura kag dumuluong nga pagpangutang agud pinansyahan ang depisit sa baligyaanay kag pagserbisyo sang utang. Ang pagsakdag sa mala-manupaktura nga nakasalig-sa-import kag sa pribado nga konstruksyon kag pagsalig sa komersyal nga dumuluong nga pautang nag-ubos sang husto sa sistema nga pangpinansya kag pang-ekonomiya. Kumpara sa pag-eksport sang ano man nga produkto, ang pag-eksport sang

mga de kontrata nga mamumugon siya nagpasulod sang pinakadaku nga dumuluong nga suhol. Ang suhol nga ini ginalamon sang mga multinasyunal nga bangko kag kumpanya kag mga mapanghimulos nga sahi.

Ang orasyon sang tanan nga reaksyunaryo “global nga kumpetisyon”. Pero wala sang pwede nga i-eksport nga ekonomiya sang Pilipinas kon indi mga hilaw nga materyal, mala-manupaktura nga reeksport kag de-kontratang mamumugon. Naipit ang mga ini subong sang pangkalibutanon nga pagsobra sa suplay kag huyog nga resesyunaryo. Bisan ang pag-eksport sang kalalakihan kag kababainhan pinakitid sang mga pang-ekonomiya kag ligal nga restriksyon sa iban nga pungsod, bangud sa pangkabilugan nga pagluya kag krisis sa sobra nga produksyon sang pangkalibutanon nga sistema nga kapitalista.

Bangud sa iya pag-apin sa polisa nga “neoliberal” kag nagalala nga pagkabangkarote, ang malakolonyal nga nagahari nga sistema indi man lang makapromisa o makapagkuno-kuno magapatuman sang ano man nga mayor nga proyekto nga industriyal kag reporma sa duta. Naglab-ot ang rehimen sa pagsakdag sang mga talapuanan sa sugal bilang mga “tagabanderang” proyekto sini. Ginatugyan sini ang tanan sa ginatawag nga hilway nga balaligyaan kag nagalab-ot ini sa pagmanipula sa porsyento sang interes, pagpabug-at sang palasanon nga buwis sang pumuluyo kag paghatag prayoridad sa hilway nga ilig sang kapital sa pinansya, pagbayad sa utang kag hinguyangon nga militar sangsa sa mga serbisyo nga pangkatilingban.

Ang malapad nga masa sang pumuluyo pilit nga pinagkinot samtang ang mga mapanghimulos nga sahi nagpagusto sa tanan nga magasto nga sahi sang konsumerismo nga nakasalig-sa import pareho sang mga mansyon, matag-as nga bilding, kotse kag mga “high-tech” nga produktong pangkonsumo. Ginapatay pareho sang “downsizing” kag pagsera sang mga talapuanan ang trabahong regular. Indi manubo sa 77 porsyento sang pwersa sa paggawa ang upisyal nga ginakilala nga wala sang trabahong regular. Sila ginakategorya bilang wala sang trabaho, kulang sa trabaho, kaswal kag empleyado-sang-kaugalingon.

Bunga sang mabaskog nga pagpamatuk sang malapad nga masa sang pumuluyo, napaslawan ang rehimen US-Estrada nga amyendahan ang konstitusyong 1987 agud kuhaon ang mga probisyon nga nagatatap sa pungsudnon nga patrimonya kag nagalimita sa dumuluong nga



pagpangapital. Pero gin-gamit sini ang Kongreso agud ihatag ang tumalagsahon nga mga pribilehiyo sa mga imperyalista nga bangko kag talapuanan. Kada tipo sang negosyo gin-abre sa mga dumuluong nga monopolyo. Nagahimbunanay ang rehimen kag mga monopolyo sang lana sa wala untat nga pagpataas sa presyo sang lana kag kon subong sadto sa presyo sang tanan nga mga sandigan nga produkto kag serbisyo.



Ang implasyon ginatulod sang gastos sa pagbayad sang utang, depisit nga paggastos, pag-import kag korupsiyon subong man sang kakulangan sa mga sandigan nga produktong pangkonsumo bangud sa pagkahulog sang lokal nga produksyon. Sa idalum sang islogan sang hilway nga baligyaanay, nagatubo ang dalagku nga kumprador halin sa pag-import kag pag-eksport sang kalamay, bugas, mais kag mantika, samtang ginaipit sang importasyon ang suhol sang mga mangunguma kag mamumugon sa uma kag ang lokal nga produksyon.

Kabaylo sang pagmasinolundon sang rehimen, si Estrada kag iya mga kroni ginhatagan sang mga imperyalista sang daku nga kahalugon sa burukratiko nga korupsiyon kag represyon. Pero ang mga papet nakaagom sang akig sang IMF bangud sa paliwat-liwat nga paglampas sa gintalana nga dulunan sang depisit nga paggastos kag subong man sa World Bank bangud sa sobra nga pangwarta kag korupsiyon nga nagalab-ot sa 44 porsyento sang tanan nga gastos sang gubyerno. Ginasakdag sang imperyalismo ang korupsiyon kag kroni-ismo sa kubay sang iya mga papet pero oras nga nagpanimaho ang baho sang iya puno nga papet kag nangin pabug-at sa kapuslanan, ang mga imperyalista nga amo preparado nga maghatag sang bag-o nga puno nga papet.

Ang depisit sa badyet kag baligyaanay nagadaku. Kadungan sini, nagamala naman ang dumuluong nga pautang. Ang pagnubo sang porsyento sa interes sadtong una nga duha ka tuig sang rehimen indi masustini. Ginapadasig ang lokal nga pangpublikong pangutang gani man nagalala padayon ang implasyon. Ang krisis sang lokal nga nagahari nga sistema hugot nga nakagapos sa nagalala nga krisis sa sobra nga produksyon sa pangkalibutanon nga sistema nga kapitalista. May sobra nga produksyon subong sang kada tipo sang produkto relatibo sa nagagamay nga pangkalibutanon nga balaligyaan. Naggamay ang balaligyaan resulta sang “neoliberal” nga polisa sa pagpang-ipit sa sweldo kag kahimtangan sa kabuhian sang anakbalhas.

Mangin ang mga *high-tech* nga produkto para sa produksyon kag konsumo grabe nga ginatamaan subong sang krisis sa sobra nga produksyon. Ang subong sini nga tipo sang produkto ang nagaseguro sa pagpanguna sang US sa pangkalibutanon nga ekonomiya nga kapitalista sa kabilugan sang ulihi nga dekada kag nagganyat sang dumuluong nga pagpangapital sa US. Subong, ang paglupok sang bula sang “bag-o nga ekonomiya” sang US (pinahabok nga balor sang mga kagamitan, pag-uswag nga nakatuntong sa pagbuhin sang empleyado kag sobra nga pagtanta sa *high-tech*) pwede magresulta sa pagpalagyo sang pagpangapital nga Europeo kag Hapon halin sa US kag sa wala sang kasubong nga krisis sa ekonomiya kag pinansya sa pangkalibutanon nga sakop.

Sa Pilipinas, ang anakbalhas nga masa nga mamumugon kag mangunguma kag ang nahanunga nga saray sang katilingban malala nga ginapabudlayan sang malapad nga kawad-an-pangabuhian, pagkahulog sang matuod nga suhol, implasyon, pagkahulog sang piso, nagabug-at nga palas-anon nga buwis kag pagkabuka sang imprastruktura kag serbisyo nga pangkatilingban. Mangin ang mas matag-as kag matag-as nga nahanunga nga mga sahi nagareklamo sa pagtaas sang balor sang ila dalayawon nga pagkonsumo nga nakasalig-sa-import. Gani naeskandalo sila sang wala kag tuo nga pagpanagtag ni Estrada sang mansyon kag *limousine* sa iya madamo nga asawa.

Ang krisis sa ekonomiya ang ginahalinan sang subong nga krisis sa pulitika. Labi nga naglala ang away sa tunga sang mga reaksyunaryo bangud ang kaban sang manggad nga mapagtungaan sobra nga naggamay kag ginasolo pa sang nagahari nga grupo nga Estrada. Ang pangunahon nga nabugayan sang burukrata kapitalismo si Estrada mismo, si Eduardo Cojuangco, pila ka negosyante nga Pilipino-Tsino kag ang sarisari nga pamilya ni Estrada.

Kumakabig sang soburno si Estrada sa nagasunod nga pamaagi: pag-isyu sang mga permit kag lisensya, pagdisposisyon sang pautang sang estado, mga kontrata sa pagsuplay sa reaksyunaryo nga gubyerno, dalagku nga kaso sang paglikaw sa buwis, teknikal nga ismagling, pagmanipula sa *stockmarket* kag distribusyon sang pondo sa *pork barrel* nga iya ginasolo.

Pareho sang isa ka hepe sang Mafia, ginaangkon niya ang bulto sang suhol halin sa huweteng, operasyon sa pangingidnap kag lokal nga pagbaligya kag trapik sang

ginpagdilian nga bulong pakadto sa US kag mga base militar sang US. Subong sadto lamang nga ang personal nga kaswapangan ni Estrada amo gani ang isa ka yabi nga katapu sang iya “*midnight cabinet*” nagbulag sa iya kag ibinulgar ang iya papel bilang hepe nga kriminal.

Wala sang kontrol kag tuman kahayag sang korupsiyon ni Estrada gani kalabanan sa mga seksyon sang mapanghimulos nga sahi ang nagakundena sa iya tiko nga moralidad kag nagaupod sa malapad nga nagahiliugyon nga prenteng nagahulag agud pahalinaon siya sa poder. Halos tanan nga mga organisasyon sa negosyo, mga kleriko nga Katoliko kag Protestante kag mga ulama nga Islam, mga organisasyon nga sibiko kag propesyunal, mga organisasyon sang madalag nga unyon kag kadam-an sang mayor nga masmidya nga burges nagpanawagan nga magresayn si Estrada. Ang mga obispo, kleriko kag kinaandan nga Katoliko nagmobilisa agud tupadan ang suporta kay Estrada sang El Shaddai (isa ka hubon nga “charismatic”) kag Iglesia ni Kristo.

Si Cardinal Sin, daan nga presidente Aquino kag Ramos, ang Lakas-NUCD kag United Opposition mabaskog nga nagapanawagan nga islan ni bise-presidente Gloria Macapagal-Arroyo si Estrada. Ang iban lain pa nga mapuslanon nga hubon sang mga reaksyunaryo nga kontra-Estrada ang Council of Philippine Affairs (COPA) nga ginapamunuan ni Jose Cojuangco, ang People’s Consultative Assembly (PCA) ni daan nga presidente Ramos, ang Kangkong Brigade (ginapasakupan sang mga gobernador kag mayor sang Nabagatnan Katagalugan, Metro Manila kag Tunga nga Luzon) kag Kompil II nga ginasuguran sang mga maka-Heswitang “sosyal-demokrata” nga sa pagkamatuod mga Kristyanong-demokratang nakabig sa matag-as nga sahi.

Ara sa proseso sang pagkaguba ang Lapian ng Masa nga Pilipino (LAMP), ang koalisyon nga maka-Estrada. Ang mga yabi nga lider sang LAMP sa pagpanguna sang ispiker sang Kongreso kag presidente sang Senado nagsaylo na sa oposisyon kag nagapanawagan sang resignasyon ni Estrada. Ang mga kongresista nga daan nga ara sa LAMP dumampig sa oposisyon nga nagahulag agud i-*impeach* si Estrada. Indi napunggan sang mga senador nga nagapabilin nga LAMP ang bista sa Senado.


Ang Laban ng Demokratikong Pilipino (LDP), nga pinakadaku nga bahin sang LAMP, nakatalana nga bug-os nga nagbulag sa LAMP sa pagpukan ni Estrada. Ang pinakasipsip nga mga alagad ni Estrada sa LAMP ang kaugalingon niya nga Partido ng Masang Pilipino kag ang Nationalist People’s Coalition ni Eduardo Cojuangco. Ang

mga ini ginabulag subong sang nagabaskog nga kahublagan nga Estrada resayn.

Lain kay Marcos, si Estrada wala sang mabaskog nga kapyot sa pwersa nga militar kag pulis. Ang pinakamasupog niya nga mga alagad nga armado ara sa Presidential Anti-Organized Crime Task Force (PAOCTF). Ini ang iya Gestapo sa pagpamuno sang iya hepe nga birador nga si Hen. Panfilo Lacson. Ini ang pinakapinapaburan nga armado nga ahensya nga may daku nga pondo sa intelihensya nga indi naawdit. Ginapuslan sini ang lisensya sa wala sang untat nga pagpatay kag nagahulag bilang tagapagkoordinang mga kriminal nga sindikato.

May malala nga away sa tunga sang grupo nga Lacson sang PAOCTF kag regular nga pwersa sang pulis kag militar. Ang mga isyu ginatampukan sang pagmonopolyo sang PAOCTF sang suhol sa proteksyon, paghabig sang pinakadaku nga pondo sa intelihensya, paboritismo sa promosyon, panghilabot ni Lacson mangin sa promosyong militar, ang suhol sa mga kontrata sa pagsuplay kag naulihi nga pasweldo sa mga kinaandan nga tinawo guwa sang PAOCTF.

Nagtuhaw ang Federation of Retired Commissioned and Enlisted Soldiers (FORCES) kag pila ka likom nga hubon sang mga upisyal sang pulis kag militar sa aktibo nga serbisyo agud magpanawagan sang pagreresayn ni Estrada. Ginabuyok nila ang mga upisyal sang pulis kag militar sa aktibo nga serbisyo nga iatras ang ila suporta kay Estrada kag tahuron ang kinamatarung sang taumbayan nga magtipun-tipon. May daku nga isip sang mga upisyal sang pulis kag militar nga labi nga nagapakita sang ila oposisyon kay Estrada kag General Lacson kag sila nakapusisyon agud nyutalisahon ang duha.



Madugay nga ginapanawagan sang BAYAN ang pagpahalin kay Estrada bag-o pa man sa mga reaksyunaryo nga kontra-Estrada. Ini ang pinakamabug-at nga ligal nga demokratiko nga koalisyon sang mga makibanwahanon kag progresibong pwersa sang sahi nga mamumugon, mangunguma kag petiburgesya nga syudad nga nagasunod sa linya sang paghimakas para sa pungsudnon nga kahilwayan kag demokrasya. Ini ang pinakamuklat, pinakamilitante kag pinakamasaligan nga pwersa sa malapad nga nagahiliugyon nga prente sa pagpahalin sa nagahari nga grupo nga Estrada.

Pasok sa BAYAN ang mga sektoral nga alyansa kag organisasyon nga pangunahon nga ginapasakupan sang masa nga anakbalhas pareho sang Kilusang Mayo Uno (mamumugon), COURAGE (mga empleyado sang gubyerno), Kilusang Magbubukid ng Pilipinas (mangunguma), PAMALAKAYA (mananagat), Kadamay (imol sa syudad), GABRIELA (kababainhan), kag Anakbayan (Pamatan-on). Pasok man diri ang mga pormasyon sang petiburgesya nga syudad pareho sang League of Filipino Students (LFS), Alliance of Concerned Teachers (ACT), CONTEND (mga manunudlo sa unibersidad kag kolehiyo), KARAPATAN (kinamatarung nga pangtawo), Promotion of Church People's Response (PCPR) kag madamo pa nga sektoral nga alyansa kag organisasyon nga propesyunal kag nakasandig-sa-isyu.

Sakop sang BAYAN ang mga pwersa nga Wala kag Nahanunga nga nagasunod sa pungsudnon nga demokratiko nga linya. Sa malapad nga nagahiliugyon nga prente, nagapakigbuligan man ini sa mga mamumugon, mangunguma kag nahanunga nga sektor nga indi organisado ukon nalakip sa mga organisasyon kag institusyon nga may pagapamunuan nalakip sa Tunga ukon Tuo sa ideolohiya kag pulitika.

Ang malapad nga nagahiliugyon nga prente ginabug-os Wala, Tunga kag Tuo nga kontra-Estrada. Ini isa ka halog nga alyansa nga ginbugkos sang isahanon lang nga katuyuan nga pahalinon si Estrada. Nangin mas mahapos para sa Wala kag Tunga nga makipag-isa sa mga pwersa sang Tuo, nga maathag nga reaksyunaryo pero kontra-Estrada, sangsa sa pila ka gagmay nga hubon nga nagapakuno-kuno nga Wala pero nagabuko nga ilihis ang konsentrado nga bira kay Estrada kag sabotahein ang malapad nga nagahiliugyon nga prente.

Ang Sanlakas kag iban pa nga gagmay nga hubon nga Trotskyista nagahulag sigun sa instruksyon sang eksperto sa *psywar* sang militar (sang Intelligence Service sang AFP sa partikular) agud ibaligya ang linya nga “resign all” agud sagupon si Estrada. Sa kaso naman sang Akbayan, ang pila sa mga lider sini mga loyalista sang rehimen nga Estrada, samtang ang iban naman nagapanawagan sang pag-*impeach* ukon pagresayn ni Estrada. Ang Sanlakas kag Akbayan nagabangga sa malapad nga nagahiliugyon nga prente kag kon subong sadto ginahimulag ang kaugalingon sa kahublagan nga masa. Nakit-an sang mga traydor ang ila pangpulitika nga lulubngan sa idalum sang rehimen nga

US-Estrada.


Ang mga tampalasan nga kasubong nanday Horacio Morales kag Edicio de la Torre, nga nagapanguna nga tinawo pareho sang Akbayan kag JEEP ni Estrada, upod sa mga puno nga ahente sa *psywar* sang rehimen nga Estrada. Sila ang may padihot sa linya nga nagakadapat kuno nga mapawala sang sala si Estrada pareho sang mga “subersibo” sa panahon sang rehimen nga Marcos sa epektibidad sang mga “teknikalidad” kag indi kuno nagakadapat napukan ang rehimen bangud indi naman ini mapamigos.

Ang rehimen nga US-Estrada pareho sala kag mapangpigis. Ginagamit sini ang militar, pulisya, mga pwersa nga paramilitar kag pribado nga armado nga grupo agud ipatuman ang kontra-mamumugon nga polisa, pagkuhaan ang masa nga mangunguma kag pungsudnon nga minorya sang ila duta kag sa kalakasan ang mga aksyon nga protesta sang masa. Ginapalala sini ang mga kampanya nga militar sang pagdaug sa rebolusyonaryo nga base nga masa kag pwersa sang Partido Komunista ng Pilipinas kag Moro Islamic Liberation Front (MILF).

Sa nagligad nga tuig, sa idalum sang “Oplan Makabayan” kag iban nga kaangot nga kampanya, naglunsar ang rehimen sang malaparan nga kampanya nga militar sang pagdaug batuk sa mga rebolusyonaryo nga pwersa sa bilog nga kapuluan, nga nagatumok sa tatlo tubtob sa lima ka rehiyon sa kada panahon. Naghiwat ini sang malaparan nga paglusob sa mga kampo kag areya sang MILF sa paslaw nga pagbuko nga manulsol sang sobinismo nga Kristyano, magpakita sang kusog kag isaylo ang atensyon sang publiko halin sa mga iskandalo kag korupsiyon.

Pero ang BHB madinalag-on nga nakapaglunsar sang masanag nga mga taktikal nga opensiba batuk sa mga maluya nga bahin sang kaaway samtang maalam nga nagalikaw sa mas mabaskog nga pwersa sang kaaway. Ang hangaway sang MILF nagapatuman na man sang gerilya nga pagpakig-away kag nagahatag sang mabug-at nga bunal sa kaaway.

Ang dalagkuan nga gastos sa pagkabutang kag operasyon sang militar kag pulisya nagapatong sa burukratiko nga korupsiyon kag nagabunga sang indi masarangan nga depisit nga paggastos. Ang wala sang untat nga paggastos militar, pagguba sa palangabuhian kag kagamitan kag malaparan nga pagpahalin sa kapin isa ka milyon nga pumuluyo nagaguba sang daku sa ekonomiya.



Kon gani ang pagbayad sa sweldo sang kinaandan nga mga empleyado sang gubyerno kag tropa naatrasar sang madamo nga bulan.

Tuman kademoralisado ang militar, pulisya kag pwersa nga paramilitar sang kaaway dulot sang korupsiyon sang rehimen nga Estrada, sang pag-us-os sang balor sang ila sweldo, sang kapoy halin sa wala untat pero paslaw nga mga operasyon nga kontra-rebolusyonaryo, sang nagapadamo nga pagkumpiska sang armas halin sa ila sang mga rebolusyonaryo, kag sang mga mabug-at nga halit nga ginapatilaw sa ila sang mga taktikal nga opensiba sang Bagong Hukbong Bayan kag hangaway sang MILF.

Ang masa nga anakbalhas sang mamumugon kag mangunguma, ang nahanunga nga saray pangkatilingban kag ang kadam-an nga bahin sang mga mapanghimulos nga sahi pabor sa pagpahalina sa poder sa nagahari nga grupo nga Estrada. Mangin ang mga amo nga imperyalista nagpasayod nga naubusan na sang serbi ang grupo. Tapos na ang nagahari nga grupo nga Estrada. Wala na ini sang pamaagi nga makaalpas halin sa pagkahimulag sa atubang sang padayon nga nagalala nga krisis sang nagahari nga sistema. Nagaatubang subong sang mga rebolusyonaryo nga pwersa kag masa ang dalagku nga kahigayunan agud magpakusog kag nagaani sang mas dalagku nga kadalag-an.

II. ANG HUGOT NGA KATUNG DANAN NGA PUKANON ANG REHIMEN NGA ESTRADA

Mabakud kag militante nga ginasakdag sang Partido, Bagong Hukbong Bayan kag rebolusyonaryo nga masa ang bag-o nga demokratiko nga rebolusyon paagi sa malawigan nga inaway banwa kadungan sang pagpakig-angtanay sa malapad nga nagahiliugyon nga prente kag kahublagan nga masa nga nagtuhaw para sa ispesipiko kag gilayon nga katuyuan nga pahalinon sa gahum ang nagahari nga grupo nga Estrada.

Samtang masako ang mga reaksyunaryo sa ila mga away kag banggianay para sa pangpulitika nga gahum kag samtang nagaabanse ang malapad nga nagahiliugyon nga prente agud kuhaon si Estrada sa gahum, mapadasig sang rebolusyonaryo nga pwersa sang pumuluyo ang ila hilikuton pangmasa sa kanayunan kag kasyudaran kag maihimo ang solido nga pag-organisar sang masa sa tunga sang nagaragasa nga kahublagan nga masa para sa pagpahalina kay Estrada.

Ginapadanlog sang malapad nga nagahiliugyon nga prente ang hilikuton sang mga

rebolusyonaryo nga pwersa nga pukawon, organisahon kag pahulagon ang masa sang pumuluyo sang milyun-milyon. Makapulosa sa polisa sang nagahiliugyon nga prente sang Partido ang ligal nga kahublagan nga demokratiko kag mangin ang armado nga rebolusyonaryo nga kahublagan.

Samtang ang malapad nga kahublagan nga masa nagamadlos sa bilog nga pungsod kag ang kaaway naman napilitan nga tipigan ang kaugalingon paagi sa pagtipon sang mas madamo nga tropa sa kasyudaran, pwede hingalitan sang Bagong Hukbong Bayan ang pagbuhin sang tropa sang kaaway sa kaumahan agud pasingkion ang mga taktikal nga opensiba.

Ang pagtipon sang malapad nga nagahiliugyon nga prente sang mga pwersa batuk sa pinakamakitid nga target—ang subong nga nagahari nga grupo indi nagakahulugan sang pagbag-o sang programa sang bag-o nga demokratiko nga rebolusyon kag sang istrategiko nga linya sang malawigan nga inaway banwa. Ini nagakahulugan lamang sang pagpadasig sang kumpas sang mga protesta nga masa kag rebolusyonaryo nga pagpamatuk nga magamit sang mga rebolusyonaryo nga pwersa agud labi ini nga magbakud kag mag-abanse.

Nagahimud-os ang Partido nga ipatuman ang pagpamuno sini kag mapabilin ang pagkinaugalingon kag inisyatiba sini paagi sa pagpatuman sang pangmalawigan nga programa sang bag-o nga demokratiko nga rebolusyon bisan pa ini nagapakigbuligan sa malapad nga kubay sang mga alyado agud ipatuman ang hugot nga katungdanan nga pahalinon sa poder ang nagahari nga grupo nga Estrada. Ang pagbundak sang ligal nga kahublagan nga masa nagabulig sa pagpasingki sang armado nga paghimakas nga amo ang pangunahon nga porma sang paghimakas.

Samtang ginapabilin ang iya pagkinaugalingon kag inisyatiba, wala sang untat nga ginapalapad sang Partido ang linya sang bag-o nga demokratiko nga rebolusyon batuk sa imperyalismo, pyudalismo kag burukrata nga kapitalismo, ginapalapad kag ginapadalum ang rebolusyonaryo nga baseng masa, pinasingki ang inaway banwa base sa kapasidad kag ginabuyok ang mga makibanwahanon kag progresibo nga pwersa sa ligal nga kahublagan nga masa nga gilayon nga pahulagon ang minilyon nga pumuluyo.

Ang rebolusyonaryo nga pwersa may maathag nga paghangup sa gilayon kag pangmalawigan nga katuyuan sang kahublagan nga masa. Wala sang pagkasalangisag sa ila kubay kon ano nga moda sang hulag ang



nagakadapat sa kasyudaran kag sa kaumhan. Ang mga “Wala” kag ang Tuo nga oportunista nga ara sa matag-as nga pusisyon kag nagsabwag sang kagamo sa sulod sang Partido sadtong mga tuig nga 1980 madugay nga naglayas kag nagadampig sa kaaway.

Ang mga “Wala” nga oportunista nag-ilusyon nga masarangan nila nga pukanon ang bilog nga nagahari nga sistema kadungan sang nagahari nga grupo nga Marcos paagi sa insureksyon sa kasyudaran ukon magkadungan nga militarismo sa kaumhan kag insureksyon sa kasyudaran. Sila subong mga hayagan nga ahente sa psywar kag pagpanilag sang kaaway pareho nanday Romulo Kintanar, Arturo Tabara kag Benjamin de Vera. Samtang, sanday Filemon Lagman kag iban pa nga Trotskyista padayon nga nagpakuno-kuno nga mas “Wala” sangsa Wala paagi sa panawagan sa gilayon nga pagpahalin sang tanan nga reaksyunaryo nga upisyal sa ila inutil nga pagbuko nga tungaon ang malapad nga nagahiliugyon nga prente kag italang ang konsentrado nga hitad sa nagahari nga grupo nga Estrada.

Ang madugay na nga mga Tuo nga oportunista sa nagligad pareho nanday Horacio Morales kag Edicio de la Torre wala sang kahuy-anan nga naglublob sa burukratiko nga korupsiyon kaupod sang ila “populistang” idolo nga si Estrada kag upod sila sa mga pinakaaktibo nga ahente nga *psywar* sang rehimen nga nagabato sa malapad nga nagahiliugyon nga prente kag sa malapad nga kahublagan nga masa. Si Morales ang pinakamasupog nga kakutsaba ni Estrada kag Eduardo Cojuangco sa pagpangawat halin sa mga mangunguma sa nyugan sang pondo halin sa *coco-nut levy* kag sa pagbandira isip reporma sa duta sang korporatibo nga pagpangawat sang duta ni Cojuangco.

Ang mga rebolusyonaryo nga pwersa kag pumuluyo, sa idalum sang pagpamuno sang Partido, may maathag nga naintiendihan sa subong nga balanse sang pwersa sa tunga sang armado nga rebolusyon kag sang armado nga kontrarebolusyon. Wala sila sang ano man nga oportunista nga ilusyon nga ang kahublagan sa pagpahalin kay Estrada magahatag sa ila sang kahigayunan nga maagaw ang gahum halin sa mga reaksyunaryo ukon makabahin sa gahum bilang gilayon nga resulta sang katumanan sang subong nga pagtinguha nga pahalinin si Estrada.

Muklat sila nga indi pa nila maipukan ang bilog nga nagahari nga sistema pero pwede nila nga hingalitan ang krisis sang nagahari nga sistema kag ang pagkatunga sang mga reaksyunaryo, pukanon kag silutan ang subong nga nagahari nga grupo, pabaskugon ang ila kubay nga sa

subong sadto nagatikang paabanse sa bag-o nga demokratiko nga rebolusyon.


Sa pagpursegir sang nagahiliugyon nga prente sa ano man nga tion, ginakonsentra sang Partido ang pinakamalapad nga kubay sang mga pwersa batuk sa pinakamalala nga reaksyunaryo nga ara sa gahum isip pinakamakitid nga target. Sa pagpamatuk kag paglutos sang magkasunod nga kaaway, nagabaskog kag nagaabanse ang Partido tubtob sa tion nga masarangan sini nga pukanon ang bilog nga nagahari nga sistema.

Agud pukanon ang bilog nga nagahari nga sistema, ginakinahanglan nga balion ang taludtod sang armado nga pwersa sang kaaway sa kaumhan kag dugmukon ang makinarya nga burukratiko kag militar sang reaksyunaryo nga estado. Agud pukanon ang nagahari nga grupo nga Estrada sa partikular, posible nga mapatigayon ini sang malapad nga nagahiliugyon nga prente kag kahublagan nga masa nga ligal pareho sang natabo kay Marcos sadtong 1986.

“Wala” nga oportunismo ang mag-ilusyon nga ang pangmalawigan nga katuyuan nga pukanon ang nagahari nga sistema maangkon sa proseso sang pag-angkon sang gilayon nga katuyuan nga pukanon ang nagahari nga grupo nga Estrada. Sa pihak nga bahin, Tuo nga oportunismo ang pagkalipat sa pangmalawigan nga katuyuan nga pukanon ang nagahari nga sistema kag pag-ampo sang pagkinaugalingon kag inisyatiba sang Partido sa malapad nga nagahiliugyon nga prente.

Nagakadapat naton nga bug-os nga tinguhaan nga ipabilin kag pabaskugon ang malapad nga nagahiliugyon nga prente agud pahalinin ang nagahari nga grupo nga Estrada ukon pwersahon ini nga magbuhi. Pero samtang ginasakdag nila ang malapad nga nagahiliugyon nga prente, nagakadapat kondenahan sang ligal nga makibanwahanon kag progresibo nga pwersa ang sandigan nga mga palaligban sang malakolonyal kag malapyudal nga nagahari nga sistema kag iatubang ang mga pungsudnon kag demokratiko nga pangabay sang pumuluyo.

Sa subong nga tindog sang malapad nga nagahiliugyon nga prente, labina sa ligal nga larangan, ini nagatuhay sa rehimen nga Estrada kag may matag-as nga potensyal ini agud pukanon ang rehimen paagi sa malinong, dalagkuan kag militante nga aksyong masa sa bilog nga pungsod tubtob sa ang mga ini maglab-ot sa paglikup sa palasyo sang presidente sang indi manubo sa isa ka milyon nga pumuluyo tubtob sa magbuhi si Estrada. Kaupod sa mga yabi nga



pwera agud maipatuman ang subong sini nga higitang mobilisasyon ang BAYAN, Estrada Resign Movement, Simbahang Katoliko, United Opposition, COPA, PCA, Kangkong Brigade kag Kompil II.

Ang putok-putokan nga aktibidad sang pagsalikup sang indi manubo sa isa ka milyong pumuluyo sa palasyo sang presidente kag mga operasyon nga pangparalisa sang sistema nagakadapat mangin kasubong kadaku sang pagalsang 1986 nga nagpapakun sa pasista nga rehimeng Marcos. Nagakadapat man sini nga labawan ang paltik nga “prayer rally” sang El Shaddai kag Iglesia ni Cristo kasan-o agud suportahan si Estrada.

Sa pagpabilin kag pagpabakud sang malapad nga nagahiliugyon nga prente, nagakadapat naton nga muklat nga ipatuman ang rebolusyonaryong makisahi nga linya nga ginapasakupan sang nagasunod :

1 Nagakadapat kaptan sang sahi nga mamumugon ang pagpamuno paagi sa Partido Komunista ng Pilipinas. Ang likom nga Partido nagakadapat magpatuman sang pagpamuno paagi sa paggamit sang husto nga pamaagi kag estilo, labina sa kasyudaran.

2 Nagakadapat pabaskugon ang sandigan nga alyansa sang sahi nga mamumugon kag mangunguma. Nagakadapat pabaskugon sang kahublagan nga masa ang kahublagan nga unyon sa kasyudaran kag ang armado nga rebolusyon sa kaumhan.

3 Nagakadapat lubos nga patingkaron sang alyansa sang mga progresibong pwera ang pwera sang petiburges sa kasyudaran. Nagakadapat pa nga mas labi nga pauswagon sang kahublagan nga masa ang pangpulitika nga edukasyon, organisasyon kag mobilisasyon sang petiburges sa kasyudaran kadungan sang masa nga anakbalhas.

4 Nagakadapat lubos nga patingkaron sang alyansa sang mga positibo nga pwera ang mga pwera sang nahanunga nga burgesya. Gamay lamang ang isip sang nahanunga nga burgesya pero kinahanglan buyukon sila nga suportahan ang kahublagan nga masa.

5 Nagakadapat sakdagon ang temporaryo nga pagpakig-alyansa sa mga reaksyunaryo nga kontra-Estrada, bisan pa ang mga alyadong pareho nila indi maligon kag indi masaligan. Ang pagpakig-alyansa sa ila nagahalin sa mga kontradiksyon sa kubay sang mga

reaksyunaryo. Ini nagpadasig sa pagkatunga sang kaaway kag nagbun-ag sang mapuslanon nga direkta kag indi-direkta nga suporta sa kahublagan nga masa.

6 Sandig sa kadalag-an sa lima ka punto sa ibabaw, lubos naton nga maihimulag ang nagahari nga grupo nga Estrada bilang kaaway kag maipukan ini. Sa proseso, magabaskog kag aabante ang rebolusyonaryo nga kahublagan kag pumuluyo.

Sa malapad nga nagahiliugyon nga prente agud pukanon ang rehimeng Estrada, upod sa wala ang mga sandigan nga organisasyon nga masa, sektoral kag multisektoral nga mga alyansa nga matuod nga nagasakdag sang mga kinamatarung, interes kag handom sang sahi nga mamumugon, mangunguma kag petiburges sa kasyudaran. Ang mga ini ang sandigan nga pwera sang pungsudnon demokratiko nga kahublagan.

Ang Nahanunga ginapasakupan sang mga pwera nga petiburges sa pangkabilugan kag sang nahanunga nga burgesya nga nagkagusto sang reporma sa sulod sang nagahari nga sistema para sa ila “natungang-sahing” interes kag sa ngalan sang pumuluyo. Kritikal sila sa mga malain nga aspeto sang sistema nga pangkatilingban sang daku nga kumprador kag agalon nga mayduta pero kapos sa rebolusyonaryo nga panindugan agud pukanon ang nagahari nga sistema kag tukuron ang demokratiko nga sistema nga banwa.

Ang kontra-Estradang Tuo ginapasakupan sang mga pwera nga nagatiglawas sa mga reaksyunaryo nga sahi nga daku nga kumprador kag agalon nga mayduta, nagakabig kay Estrada bilang isa ka indi-mabug-at nga abagahon para sa nagahari nga sistema kag nagkagusto nga bayluhan siya agud mapabaskog ang nagahari nga sistema. Pwede mapabilin sa malapad nga nagahiliugyon nga prente ang mga pwera nga ini samtang indi nalubad ang kontradiksyon nila sa nagahari nga grupo nga Estrada nga pwede lamang sa pagpahalin sa ulihi.

Ang padihot ni Estrada agud magpabilin sa gahum ginapasakupan sang mga nagasunod:

1. Kontra-komunistang isterya, pagpamahog kag pang-intriga agud tungaon ang malapad nga nagahiliugyon nga prente kag kahublagan nga masa kag paggamit sang gahum kag mga rekursong sang iya posisyon batuk sa kahublagan nga masa.

2. Pagkontrol sa indi kulangon sa walo ka senador paagi sa paghatag sang mga pabor, soburno kag pondo sang *pork barrel* kag pagdaldal nga ang bista sa Senado

ang pinasahi nga “proseso nga konstitusyonal” nga nagakadapat mag-atubang sa mga kaso batuk sa iya.

3. Pagpangdaya sa eleksyon sang Mayo 14, 2001 matapos makuha sa Senado ang pagpawalangsala sa iya ukon mapunggan ini nga maghimo sang pamatbat bag-o ang kampanya para sa eleksyong 2001.

May pangkabilugan nga konsensus sa malapad nga nagahiliugyon nga prente nga pwede kag nagakadapat pahalinon si Estrada halin sa gahum paagi sa mga aksyong masa sa bilog nga kapuluan nga magaresulta sa paglikup sa palasyo sang presidente tubtob sa magbuhi si Estrada. Pero may pila ka espesyal nga hubon sa kubay sang mga Tuo nga kontra-Estrada nga may mabaskog nga ilusyon nga mapahalin si Estrada sang wala nga paglikup sang masa sa palasyo ukon siya mahukman nga nagkasala sang Senado.

Ang mga paktor para sa kombiksyon ni Estrada sang ginakinahanglan nga duha ka-katlo sang mayorya sang Senado ginapasakupan sang nagasunod: ang epektibidad sang nagalapad nga aksyong masa, ang kusog sang ebidensya kag laygay sang mga tinawo sang US sa mga senador nga buhian si Estrada. Kadungan sini, upod sa mga paktor para sa indi pag-angkon sang pamatbat sang pagkasala ukon pagpawalang-sala pa gani ang pagpadugay sa bista tubtob sa maabutan ini sang panahon sang pagkampanya sa eleksyon, ang soburno halin kanday Estrada kag Eduardo Cojuangco, ang pagbawi ni Bush sang subong nga posisyon sang US kag ang paltik nga promisa ni Estrada sa mga senador nga magbuhi siya kon siya mapawalang-sala ukon matapos ang eleksyon sa tion nga mapyerde ang iya mga kandidato sa Senado.

Tuman kabug-at kag indi-mabutigan ang ebidensyang napresentar na sa bista sa Senado kontra kay Estrada. Bastante na bastante na ini agud mahukman siya nga maysala sa soburno at pangwarta kag kagarukan. Ang pinakamabug-at nga ebidensya batuk sa iya ang mga testimonya nanday Gob. Chavit Singson, bise-presidente sang bangko nga si Clarissa Ocampo kag iban pa nga testigo kag kaangot nga mga dokumento sang bangko. Napamatud-an sang wala sang pasubali nga ginagamit ni Estrada ang alyas nga Jose Velarde agud maghakop sang kawat kag aregluhon ini sa mga transaksyon sa bangko.

Wala pa man sang kasegurohan nga mahukman nga maysala si Estrada. Kon indi siya mapawalang-sala sang iya masupog nga sumulunod sa Senado bag-o mag-umpisa ang tion sang pangampanya sa eleksyon, pwede nga padugayon sang iya abugado ang bista tubtob sa

masapawan nga ini sang nasambit nga tion. Ano man nga pagbahar sang kahublagan nga masa batuk kay Estrada seguridad nga magahatag dalan sa pagpabilin ni Estrada sa



gahum kag mapabay-an siya nga makabalos sa lain-lain nga pwersa nga upod sa malapad nga nagahiliugyon nga prente, labina pagkatapos sang eleksyong 2001.

Agud maseguro ang pagpahalin kay Estrada sa gahum, sa sulod sang una nga kwarto sang 2001, ang kahublagan nga masa base sa malapad nga nagahiliugyon nga prente batuk sa iya indi nagakadapat maglaylo kag tigaylo magpasingki pa. Nagakadapat mag-angkon sang malahiganteng aksyong masa agud maghatag paandam sa Senado nga ang pagpawalang-sala kay Estrada ukon ang paglikaw magdesisyon bag-o ang umpisa sang tion para sa kampanya nga elektoral magasulsol sang mas dalagku kag mas militanteng aksyong masa sangsa nagligad batuk sa rehimen kag sa nagagamay nga isip sang mga nagasuporta diri.

Kon indi mahukman sang Senado sang pagkasala si Estrada, nagakadapat maghiwat sang mga aksyong masa nga pareho sang nagpapukan sa rehimeng Marcos. Nagakadapat naton tandaan nga napahalin si Marcos sa pihak sang iya pagpanagil-ot nga siya ang nagdaog sa *snap presidential election* sang 1986. Mahibal-an nga maghadlok si Estrada nga maggamit sang pwersa sa iya desperado nga handom pungan kag tungaon ang malapad nga nagahiliugyon nga prente samtang iya minamanipula ang resulta sang eleksyong 2001 agud “maibangon ang kaugalingon”.

Nagakadapat ipabilin sang Wala ang iya pagkinaugalingon kag inisyatiba, hingalitan ang krisis sang nagahari nga sistema, buyukon ang mga Nahanunga sa mga aksyong masa kag ipabilin ang kooperasyon sang Tuo nga kontra-Estrada. Husto lamang nga naghiwat sang komun nga mga paghilisugot ang mga pwersa sang pungsudnon-demokratiko nga kahublagan sa iban nga pwersa kag naghatag sang kasegurohan nga padayon nga mangin malinong kag labi nga magalapad kag mangin militante ang mga aksyong masa.

Pasulit-sulit nga ginpahayag sang Partido nga sandig sa kaugalingon sini nga linya, indi ini magdeploy sang mga yunit sang Bagong Hukbong Bayan agud mag-upod sa mga ligal nga aksyong masa sa kasyudaran bangud ang nagakadapat nga papel sang BHB pasingkion ang mga

armado nga taktikal nga opensiba sa kaumhan. Ang mga aktibo kag retiradong upisyal sang militar kag pulis nagpanawagan man para sa pagbuhi ni Estrada kag nagdeklara nga irespeto nila ang kinamatarung sang pumuluyo nga magtipon kag magpahayag. Posible, kon subong sadto, pareho sang mga ulihi nga adlaw sang pasista nga rehimeng Marcos, nga mapunggan ang nagahari nga grupo nga Estrada nga gamiton ang pwersa nga militar kag pulis batuk sa nagaalsa nga masa.

Posible man nga sunud-sunod nga magpanawagan kay Estrada ang mga delegasyon sang dumuluong nga nagpautang kag ang mga aktibo nga heneral nga ini magbuhi. Matandaan naton kasan-o lamang nga si Suharto malinong nga nagpanaog sa poder sa subong sini nga pamaagi. Nagalaom ang nagahari nga grupo nga Estrada nga sagupon ini sang bag-o nga napilian nga presidente sang US. Nakalimtan sini nga halin pa sang tion sang Republikanong administrasyon ni Reagan, ang mga papet napahalin paagi sa pagpahugot sa nagpautang kag sa ultimong paandam sang pagpahalin nga gina-agi sa mga lokal nga delegasyong militar.

Bisan ara ang posibilidad sang malinong nga pagpahalin kay Estrada, nagapabilin man ang posibilidad nga ang mga loyalistang Estrada sa militar kag pulis, sa pagpamuno ni Gen. Panfilo Lacson, maghimo sang terorismo sa mga yabi nga pwersa ukon elemento nga upod sa malapad nga nagahiliugyon nga prente, gamuhon kag atakihon ang mga aksyong masa ukon labi pa, magkudeta labina batuk kay bise-presidente Macapagal-Arroyo.

Kaangot sini, matarung lamang nga maghiwat sang mga kontra tikang ang FORCES kag mga likom nga hubon sang mga aktibo nga tinawo nga militar kag pulis batuk sa mga masupog nga maka-Estrada. Bisan indi maghiwat sang kudeta agud tukuron ang isa ka hunta-militar ukon militar-sibilyan, pwede nila nga panilagan, ihamulag kag arestuhon ang mga loyalistang Estrada sa ila mga kriminal nga aksyon.

Kon maggamit sang kalakasan ang rehimeng Estrada batuk sa mga indi-armado nga masa nga nagahiwat sang ila demokratiko nga kinamatarung nga magtipon, ang Partido, BHB kag NDFP preparadong sal-on ang mga mapilitan nga magtago, pasingkion ang inaway banwa kag hiwaton ang pila ka taktikal nga opensiba nga maathag nga magapamatuod sang pagkainutil sang grupo nga Estrada nga mamuno.

Ang mas makahas pa nga hulag ni Estrada agud ipabilin ang kaugalingon sa gahum indi lamang nga magpainit sa pumuluyo nga maglunsar sang labi pa nga dalagku kag mga malala nga aksyong masa kon indi magahatag rason man

sa hangaway sang banwa nga maghiwat sang pagsilot sa pinakamasupog nga mga elemento sang nagahari nga grupo, labina sa mga manogpanulis kag mga nagalapas sa kinamatarung nga pangtawo, diinman sila sa Pilipinas.

Kon enkaso man kag magpabilin sa gahum ang nagahari nga grupo nga Estrada labaw pa sa una nga kwarto sang 2001, labi pa nga lalala ang pangpulitika kag pang-ekonomiyang krisis sang nagahari nga sistema kag labi nga magaabanse ang rebolusyonaryo nga pagpamatuk. Ang paglupok sang bula sang “bag-o nga ekonomiya” sang US nagahampak sa ekonomiya sang Pilipinas. Lupog na gani sa pagkabulgar sang iya mga krimen, si Estrada pat-ud nga indi na makapamuno sa pungsod.

Labi pa nga mangin perwisyo para sa mga imperyalista kag mga lokal nga reaksyunaryo nga ipabilin si Estrada sa gahum kag bayaan ang daan nga taktika nga ginaislan ang laos nga papet sang isa ka relatibo nga bag-o nga papet agud matakpan ang kaugalingon nila nga salabton. Labi pa nga paborable para sa rebolusyonaryo nga kahublagan kon ipabilin siya sa poder nga wala sang limitasyon sangsa sa ginhingagaw siya nga islan.

III. MGA PROSPEK MATAPOS ANG PAGPAHALIN KAY ESTRADA

Kon tion nga napukan ang nagahari nga grupo nga Estrada, si Bise-presidente Gloria Macapagal-Arroyo ang maluluklok sa papet nga pangpanguluhan suno sa konstitusyong 1987 sang reaksyunaryo nga estado. Siya ang mangin bag-o nga puno nga tiglawas nga pangpulitika sang mga lokal nga mapanghimulos nga sahi sang dalagku nga kumprador kag agalon nga mayduta.

Muklat sa lala sang krisis sang nagahari nga sistema, laban-laban nga pagatinguhaon niya nga magganyat sang suporta sa isa ka tipo sang konseho nga may kalaparon bisan man lang agud makonsolida ang iya pagginahum. Naghimo na siya sang mga pagpreparar agud diri sa pagbilog sang United Opposition, nagpabilin sang isa ka tiil sa Lakas-NUCD, pagganyat sa Council of Philippine Affairs, People’s Consultative Assembly kag Kompil II kag pagpakigkonsultahay sa mga lider sang mga simbahan, negosyo kag militar subong man sa BAYAN kag Bayan Muna.

Halin subong tubtob sa pagpukan ni Estrada, kon siya gani gilayon nga mapukan, wala sang husto nga tion agud radikal nga mabag-o ang balanse sang kusog sa tunga sang armado nga kontra-rebolusyon kag armado nga rebolusyon ukon magbilog kag magpabaskog sang isa ka konseho nga tagadumala nga matuod nga mga-alagad sa pungsudnon

kag demokratiko nga interes sang pumuluyo.

Ang mga promisa ni Macapagal-Arroyo sa ligal nga Wala sa proseso sang kahublagan agud kuhaon sa poder si Estrada magamay ang balor para sa iya kon sa tion nga nag-umpisa nga amo ang magsunod sa utos sang mga imperyalista kag mag-alagad sa interes sang mga lokal nga reaksyonaryo. Mas magasalig siya sa suporta sang LAKAS-NUCD kag United Opposition sa iya pagginahum.

Samtang ginakonsolida ang iya pusisyon, pagatinguhaon niya nga magtuga sang klima sang malapad nga suporta paagi sa paghatag sang embokada sang suporta sa reporma sa duta, kauswagan kag “social safety net” samtang nagaalagad sa mga neokolonyal kag “neoliberal” nga dikta sang mga imperyalista, IMF, World Bank kag WTO. Suno sa maayo nga laygay, pwede nga hilwayon niya ang tanan nga priso nga pangpulitika, magpromisa sang hustisya kag kabayaran sa mga biktima sang paglapas sa kinamatarung nga pangtawo, liwat nga buhion ang mga kasugot sa negosasyon nga pangkalinongan sa tunga sang GRP kag NDFP kag ipadayon ang natungdan nga negosasyon.

Bangud sa lala sang krisis sang nagahari nga sistema, ang bag-o nga rehimen mapilitan nga magsunod pa nga labi sa mga dikta sang mga imperyalista kag kadungan sini tinguhaon nga likawan ang akig sang pumuluyo paagi sa pila ka embokada sang tikang kag makatiliplang nga taktika, nga kon indi nila pagahimuon magpadasig sa iya pagkahimulag. Ang mismo nga krisis man sang nagahari nga sistema ang magaduso sa ligal nga mga demokratiko nga pwersa nga ipanagil-ot ang mga reporma nga mapuslanon sa pumuluyo, samtang ang Partido kag mga rebolusyonaryo nga masa nagapadayon sa paghimakas para sa pungsudnon nga kahilwayan kag demokrasya paagi sa malawigan nga inaway banwa.

Ang padayon nga paglala sang mga sandigan nga problema sang pumuluyo sa idalum sang bag-o nga rehimen kag ang paglala sang pangkatilingban kag pang-ekonomiya nga krisis sang nagahari nga sistema magabunga sang mas malala nga krisis pangpulitika. Pareho kadasig sang pagbuyagyag sang rehimen sang iya kontra-pumuluyo, kontranyunal kag kontra-demokratiko nga kinaiya, ang rebolusyonaryo nga pagpamatuk sang pumuluyo sisingki kag isa ka malapad nga nagahiliugyon nga prente ang patud nga magatindog.

Ang mga imperyalista nga bangko, talapuanan kag multilateral nga ahensya sa pautang (IMF, World Bank, WTO, kag iban pa.) magpadayon maggahom sang mga kundisyon nga magbutang sa ila papet sa alang-alang nga pusisyon. Ang padayon nga nagapalala nga krisis sang pangkalibutanon nga sistema nga kapitalista labi nga magapalala sa krisis sang lokal nga nagahari nga sistema kag daw inutil ang ano man nga pagbuko sang bag-o nga rehimen nga magpahalog-buot, maniplang ukon maghadlok sa pumuluyo.

Sa atubang sang paglupok sang bula sang “bag-o nga ekonomiya” sa US, ang huyog sa resesyon sang bug-os nga pangkalibutanon nga sistema nga kapitalista labi nga magdalum. Magapaintiende ini sang paggamay sang kinahanglanon sa mga imperyalista nga banwa para sa mga hilaw nga materyales kag mala-manupaktura nga eksport halin sa Pilipinas kag sa pagluya sang ikasarang sang papet nga rehimen nga baydan ang dumuluong nga utang. Labi lamang nga malubong sa krisis ang bag-o nga rehimen kag sindihan ang akig sang pumuluyo sang pagsinolundon sini sa dikta sang mga imperyalista kag pagbombo sang islogan sang “hilway nga balaligyaan”.

Kon tion nga ang papet nga rehimen liwat nga mabunyang kag mahamulag bangud sa nagapalala nga krisis kag pagpamatuk sang pumuluyo, ang mga imperyalista manghinaw sang kamot sa ano man nga responsibilidad sa krisis kag pwede pa gani nga magpahangyo nga agawon ang inisyatiba sa pagtamay sa rehimen, kalabanan kaangot sang burukratiko nga korupsiyon. Pero sa pagpamatuk sa kada rehimen, nagataas sang pumuluyo ang rebolusyonaryo nga kamuklatan, militansya kag kusog batuk sa dumuluong nga monopolyo kapitalismo, tumandok nga pyudalismo kag burukrang kapitalismo.

Ang Partido Komunista ng Pilipinas preparado sa ideolohiya, pulitika kag organisasyon nga atubangon ang bag-o nga nagahari nga hubon sa pagkapot sini sang papel bilang kaaway sang pumuluyo. Ang kusog nga natipon sang mga rebolusyonaryo nga pwersa sa proseso sang pagpamatuk sa bilog nga nagahari nga sistema kag pagpukan sa rehimen US-Estrada magamit batuk sa bag-o nga nagahari nga rehimen. Ang krisis sang nagadula nga nagahari nga sistema indi malubad kon indi labi pa nga nagalala. Padayon sini nga paburan ang pag-abanse sang bag-ong-demokratiko nga rebolusyon. **AB**

